

Sulat I

Santiago

Una Basan

Ni libro igsulat i Santiago na sábbad batà i Jose asta si Maria na innà i Jesus. Si Santiago tō tarapid katō simbaan ka mga ágpamaké ki Jesu-Cristo tun ta Jerusalem.

Igsulatan i Santiago tō mga ágpampamaké na góddō tun ta mga banuwa na madiyū tun ta Jerusalem. Sikandan tō igirrayatan tingód katō kapamaké dan ki Jesu-Cristo. Purisu igsulat si Santiago kandan ébō pabákkárrán din tō kapamaké dan ki Jesu-Cristo asta ébō manayun dan áglumu ka madigár.

Ukit kani sulat, igtinurū si Santiago na kailangan pagunawan dan tō kalitalit dan katō mga ágkaduwánnan asta katō mga ágkayu-ayuan. Ikgagiyan din sikandan na di dan mánnal katō ágtinuruán katō mga di ágpamaké, su tō igtinurū dan ánnà magunawa katō kabánnalan na igtinurū i Jesus.

Ikgagiyan din sikandan na kailangan mallayat tō ginawa dan róggun na gangat dan katō kalónód katō Áglangngagán ta. Kailangan kagiyan dan tō mga igsuwé tikud tun ta kapamaké dan ki Jesu-Cristo ébō lumónód dan. Kailangan pabbabà dan, pallayat dan ka ginawa, asta mánnal dan katō Manama asta katō mga opisyales ka gobyerno.

1 ¹Sakán si Santiago na ágsuguánnán katō Manama asta katō Áglangngagán na si Jesu-Cristo. Igsulatta ákniyu na mga Judio na ágpamaké na ikatalap asta igóddō tun ta duma mga banuwa. Ágpangumusta a ákniyu!

Kapamaké asta kahirapan

²Mga kataladi ku, atin ka ágdungguan kó katō marapung mga klasi ka kahirapan, kailangan kadayawan kó, ³su ikasóddór kó na ágkinnaman tō kapamaké yu ébō makému kó tumiis katō kahirapan. ⁴Purisu tiis kó katō mga kahirapan, su atin ka makatiis kó, mému kó nángngà, asta ándà kulang diyán ákniyu.

⁵Na, atin ka duwán tun ákniyu na ándà sóddór ka ándin tō kakalyag ka Manama na lumun din, kailangan mamuyū sikandin tun ta Manama,

asta pasóddórán ka Manama kandin, su mabasa tô Manama, asta di sikandin géllé katô mga ágpamuyù tun kandin. ⁶Asal atin ka ágpamuyù kó, kailangan sumarig kó na tabangan kó katô Manama. Kailangan di kó ágduwa-duwa, su tô ágduwa-duwa inéring katô balud na gidupán asta ágpiddán katô karamag. ⁷Tô manubù na ágduwa-duwa, ándà gó tanggapán din tikud tun ta Áglangngagán, ⁸su di sikandin ágkasarigan tingód katô mga áglumun din.

Ágkayù-ayuan asta ágkaduwánnan

⁹Na, tô kataladi na ágkayù-ayuan kailangan kadayawan su igpabantug ka Manama sikandin. ¹⁰Asta tô kataladi na ágkaduwánnan kailangan kadayawan su igpabbabà ka Manama sikandin, su duwán ágtamanán katô kantayan asta kaduwánnan din, iring katô mga bulak ka sigbát. ¹¹Atin ka ágménit tô álló, ágkalanás tô sigbát, ágkómpad tô mga bulak, asta ágkandà tô kadigárran. Iring kani tô mga ágkaduwánnan, su maté dan agad marapung pa pád tô lumun dan.

Kinnam asta tintal

¹²Ágkadayawan tô mga manubù na pakatiis katô mga kahirapan. Su ka makatiis sikandan katô pagkinnam kandan, tanggapán dan tô pulusán^a na kantayan na ándà ágtamanán na igtandô ka Manama tun ta mga manubù na ágginawa kandin. ¹³Atin ka ágdunggù tô mga kahirapan asta duwán kakalyag ka manubù na lumumu ka madat, di mému ka kumagi sikandin na Manama tô igtintal kandin, su di ágkatintal tô Manama, asta di sikandin ágtintal katô manubù. ¹⁴Asal matintal ki ukit katô áknita kakalyag na madat. ¹⁵Na, atin ka tumanán ta tô kakalyag ta na madat, salà tô katamanan ta. Atin ka inalayun ki áglumu ka salà, dungguan ki ka supak na ándà ágtamanán.

¹⁶Na, mga kataladi na ágginawaan ku, yakó áglimbung katô ákniyu sarili! ¹⁷Tuu madigár asta ándà palang kulang katô langun na ágbággén áknita katô Ámmà na Manama na igimu katô langun tun ta langit na pakamappawà kani banuwa. Agad ágkapalin asta ágkasidalungan tô mga giló tun ta langit, tô Manama di gó mapalin. ¹⁸Tingód katô kakalyag ka Manama, igbággayan ki ikandin ka mantu kantayan ukit katô kabánnal ta katô kabánnalan na ágtinuruán ébô imun ki na una igsalin din tun ta langun igimu din.

Kapaminág asta kabánnal katô kagi ka Manama

¹⁹Na, mga kataladi na ágginawaan ku, paminág kó kanak. Kailangan maminág kó katô kagi ka Manama. Yakó sékót ágkagi, asta yakó sékót

^a 1:12 Pulusán, ó korona.

ágkasókó. ²⁰Atin ka ágkasókó kó, dì kó makalumu katô nángngà tun ta saruwan ka Manama. ²¹Purisu sódô kó áglumu katô langun maripà asta madat. Pabbabà kó tun ta saruwan ka Manama, asta bánnal yu tó kagi din na igpasóddór din ákniyu, su sikandin gó tó makatábbus ákniyu.

²²Purisu tuman kó katô kagi ka Manama na igpaminág yu. Dì nángngà ka maminág kó dád, su atin ka dì kó tumuman katô igpaminág yu, áglimbungan yu tó ákniyu sarili. ²³Tô ágpaminág asal dì ágtuman inéring katô gahà dád katô bónnóng din tun ta pangalungan. ²⁴Agad mangalung sikandin, asal sékót din dád kalingawan tó igkita din. ²⁵Asal tó gestudyó katô tuu nángngà kagi ka Manama na makapaluwà ákniyu, asta gahà kani, asta dì ágkalingó katô idinág din, asal ágtuman kani, bággayan ka Manama sikandin katô kadayawan tingód katô katuman din.

²⁶Atin ka ágpanámdám tó manubù na ágpamaké sikandin, asal dì ágbanté katô ágkagin din, áglimbungan din dád tó kandin sarili, asta ándà ágpulusán katô kapamaké din. ²⁷Na, tó manubù na bánnal asta matullid tó kapangadap din tun ta saruwan ka Manama na Ámmà ta, tó gó tó ágtabang katô mga minélu asta katô mga balu tun ta kahirapan dan, asta tó dì ágkapid katô madat áglumun katô mga manubù nit banuwa.

Kailangan magunawa tó kalit-alit yu katô mga manubù

2 ¹Na, mga kataladi ku, su ágpamaké kó katô Áglangngagán ta na si Jesu-Cristo na ágkitaan ta katô séllaán ka Manama, pagunawa yu tó kalit-alit yu katô mga manubù agad ándin tó bónnóng dan. ²Su atin ka duwán duwa manubù na dumunggù róggun na palimudé kó, asta gumpak tó sábbad ka dakál é lagà asta ágpaningsing ka bulawan, asta ágkayù-ayuan tó sábbad na bissé é umpak, ³asta galit-alitán yu tó ágkaduwánnan asta ágpónsádán yu sikandin tun ta madigár gunsadanan, asal tó ágkayù-ayuan patindággán yu dád ó pónsádán dád tun ta asag, ⁴madat ni su gásson yu tó mga manubù, asta madat tó panámdám yu.

⁵Na, mga kataladi na ágginawaan ku, paminág yu ni kagin ku. Igsalin ka Manama tó mga ágkayù-ayuan nit banuwa ébô duwán ágpulusán dan ukít katô kapamaké dan kandin, asta mapil dan tun ta pagpangulu katô Manama na igtandô din tun ta mga ágginawa kandin. ⁶Asal ándà yu gó alit-aliti tó mga ágkayù-ayuan. Tó mga ágkaduwánnan na galit-alitán yu, tó gó tó girrayat asta ágpíd ákniyu tun ta ágruudanan. ⁷Sikandan tó ágbuyas katô ágkabantug ngadan katô igsakup ákniyu.

⁸Na, duwán sugù katô Manama na igpasulat din, na mà din,
 “Ginawayi yu tó unawa yu na iring katô kaginawa yu katô ákniyu sarili.”^b

^b 2:8 Levitico 19:18

Atin tô gó tô ágtumanán yu, madigár tô áglumun yu. ⁹Asal ka dì yu pagunawan tô kalit-alit yu katô mga manubù, makasalà kó. Supakan kó ka Manama su ándà kó tuman katô sugù din. ¹⁰Atin ka mánnal tô manubù katô mga sugù ka Manama, asal sábbad dád sugù tô dì din bánnalán, supakan sikandin ka Manama su ándà tuman katô langun sugù. ¹¹Su tô Manama na igkagi, “Yakó áglibug,” igkagi pagsik sikandin, “Yakó ágmaté.”^c Na, agad ándà ka ikalibug, asal igmaté ka, inému ka gó na iglapas katô sugù ka Manama.

¹²Purisu agad ándin tô ágkagin yu asta tô áglumun yu tun ta дума mga manubù, kailangan duwán kedu yu, su Manama tô rumuud ákniyu ukit katô kagi din na makapaluwà áknita. ¹³Ka rumuud tô Manama, dì gó sikandin médu katô ándà kedu dan tun ta дума mga manubù. Asal tô duwán kedu, ándà máddang din katô karuud ka Manama.

Áglumun katô ágpampamaké

¹⁴Mga kataladi ku, atin ka duwán kumagi na ágpamaké sikandin, asal dì áglumu ka madigár tun ta дума mga manubù, ándà ágpulusán katô kapamaké din, su dì makapaluwà tô manubù na iring kani. ¹⁵Atin ka duwán mga kataladi ta na ándà gumpakán asta ándà ágkakan dan, ¹⁶asta duwán kumagi kandan, na, “Mólà pa ka duwán kasunayan yu, asta mólà pa ka bággayan kó ka umpak asta ágkakan yu,” asal ka ándà bággén din kandan, ándà ágpulusán katô igkagi din. ¹⁷Na, magunawa kanan tô kapamaké yu, su atin ka dì ágtákkássan ka madigár lumu, ándà ágpulusán katô kapamaké yu.

¹⁸Na, duwán basì kumagi kanak na, “Sikuna tô duwán kapamaké, asta sakán tô duwán linumuwan.” Asal insaán ku na, pamánnun nu ka kapasállág kanak tô kapamaké nu ka ándà tákkássi katô madigár linumuwan nu? Su pasállággán ku gó áknikó tô kapamaké ku ukit katô madigár áglumun ku. ¹⁹Atin ka igbánnal ka na sábbad dád tô Manama, nángngà ni, asal agad tô madat mga espiritu ágbánnal kani asta ágkárkarrán dan tingód katô máddang dan ka Manama. ²⁰Ágkatuluan ka! Pasóddórán ku áknikó na ándà ágpulusán katô kapamaké ta ka Manama ka dì ágtákkássan katô madigár áglumun ta. ²¹Tô kamónaan ta na si Abraham tô igtanggap ka Manama na nángngà tun ta saruwan din ukit katô iglumu din, su igtuman din tô sugù ka Manama asta igtaganà din matayan tô batà din na si Isaac tun ta ággóbbówanan ébô bággén tun ta Manama.^d ²²Purisu ikasóddór ki na tô kapamaké i Abraham igtákkássan katô iglumu din. Na, ukit kani, isóddórán ta na bánnal gó tô kapamaké din. ²³Ituman tô igpasulat katô Manama sayyan, na mà din, “Igpamaké si Abraham katô Manama.

^c 2:11 Ahaán tô Exodo 20:13-14; Deuteronomio 5:17-18 ^d 2:21 Ahaán tô Genesis 22:1-19

Purisu igtanggap ka Manama sikandin na nángngà tun ta saruwan din.”^e

Tô gó tô gunayan na ágtawarán sikandin na rarak ka Manama.^f ²⁴Purisu isóddóran ta na tanggapan ka Manama tô manubù na nángngà tun ta saruwan din ukit katô áglumun din, asta ánnà dád ukit katô kapamaké din. ²⁵Iring kani si Rahab na madat bayi sayyan, su igtanggap din tô duwa manubù na igpasadun i Josue, asta su igtáddù din kandan tô ássa dalan ébô makaluwà dan, igtanggap ka Manama sikandin na nángngà tun ta saruwan din ukit katô iglumu din.^g

²⁶Ándà ágpulusán ka lawa na inaté dán. Iring pagsik kani, ándà ágpulusán katô kapamaké ka di ágtákkásson katô madigár áglumun.

Tô dilà

3 ¹Na, mga kataladi ku, di mému ka marapung tun ákniyu tô imun na taratinurù katô kagi ka Manama, su isóddóran yu na tuu maggát tô karuud katô Manama áknami na mga taratinurù ka tandingán katô karuud din katô duma mga manubù. ²Tô langun ta sékót pakalumu asta pakakagi ka mga ánnà nángngà. Tô manubù na di pakakagi ka ánnà nángngà, tô gó tô nángngà tun ta saruwan ka Manama, asta pakabanté sikandin katô kandin sarili. ³Na, ágakangan ta tô kudà ébô mánnal áknita. Purisu ágkapid ta tô kudà agad ánda é pasadunan ta. ⁴Na, panámdám yu tô barko. Agad tuu dakál tô barko asta ágpiddán katô tuu mabákkár karamag, asal ukit katô délák timon, ágkapid tô dakál barko agad ánda é pasadunan katô manubù na ágpíd. ⁵Ni dilà ta pagsik, agad délák bahin nit lawa ta, asal makapadadurung ki tingód ka dakál áglumun ukit katô ágkagin ta. Agad maluwag gó tô puwalasán, asal magóbbó tô langun ukit katô délák dád apuy! ⁶Tô dilà ta iring katô apuy na ágrágrág tikud tun ta ágsupakanan, su agad délák dád bahin kani lawa ta, asal ukit katô madat kagin ta, makadadat katô áknita sarili. Ni gó tô makadadat katô panámdám ta, asta manayun tun ta tibuk kantayan ta.

⁷Na, agad tô mga mannanap na ágpanó, áglyang, ágtákkap, asta góddô tun ta dagat, tô langun dan mému ágnayadán asta ágtinuruan ka manubù, asta duwán dán gó inayad. ⁸Asal ándà makapáttud katô kandin dilà, su inalayun ni ágkagi ka madat su di makatónnók asta ikéring katô pakélu na makamaté. ⁹Ni dilà ta tô ággamítán ta para pasalamat tun ta Áglangngagán asta tun ta Ámmà, asta ni dilà ta tô ággamítán ta para tuláddán tô unawa ta na igimu ka Manama na iring kandin. ¹⁰Purisu tikud tun ta sábbad dád babbà ágluwà tô madigár asta tô madat ágkagin

^e 2:23a Genesis 15:6 ^f 2:23b Ahaán tô 2 Cronicas 20:7; Isaías 41:8 ^g 2:25 Ahaán tô Josue 2:1-21; 6:17; Hebreo 11:31

ta. Mga kataladi ku, di ni madigár áglumun. ¹¹Tô wayig na matabbang asta tô wayig na masin di ágtikud tun ta sábbad dád sánnáp. ¹²Mga kataladi ku, ándà kayu igera na muuy ka olibo, asta ándà paras na muuy ka igera. Di pagsik makangé tô matabbang wayig tikud tun ta dagat.^h

Kapandayan tikud tun ta Manama

¹³Na, atin ka duwán manubù na mapandé asta katig ginagpát tun ákniyu, kailangan pakitanán din tô madigár ágkémun din ukit katô madigár áglumun din na ágtákkásson katô kandin kapabbabà asta kapandayan. ¹⁴Asal ka gingà kó asta ágginaawa kó dád katô ákniyu sarili, yakó ágpapadurung na mapandé kó su makabulaló kó tingód katô kabánnalan. ¹⁵Su ni kapandayan ni ánnà tikud tun ta Manama, asal tikud dád nit banuwa, asta tikud tun ta kakalyag katô manubù, asta tikud tun ki Maibuyan. ¹⁶Su atin ka duwán mga manubù na gingà asta ágginaawa dád katô kandan sarili, duwán samuk asta langun ka madat mga lumu. ¹⁷Asal tô duwán kapandayan na igtikud tun ta Manama, tô gó tô nángngà, tô malyag ka kasunayan, tô ágginaawa, tô manunug-nunug, tô tuu médu-édu, tô ágtabang katô mga kadumaan din, tô di ágduwa-duwa, asta tô di áglimbung. ¹⁸Tô mga manubù na gusay katô ágpasamuké ébô duwán kasunayan, tô katamanan dan na tanggapán dan ka Manama na nángngà tun ta saruwan din.

Gunayan katô ágpapulé asta ágpamatayé

4 ¹Manan ka ágpapulé asta ágpamatayé kó? Na, kagin ku ákniyu, tô gunayan kani su inapid kó katô ákniyu dád kakalyag. Purisu ágkasamuk tô panámdám yu. ²Atin ka duwán kakalyag yu na di yu ágkógtun, tô kakalyag yu na mimmaté kó katô unawa yu. Atin ka di yu ágkatanggap tô tuu ágkadigárran yu, ágpamatayé asta ágpatuwé kó. Asal ándà yu katanggap tô ágkadigárran yu su ándà kó pamuyù tun ta Manama. ³Agad ágpamuyù kó tun ta Manama, di yu ágkatanggap su ánnà nángngà tô ágdantulán yu, su tô ágpamuyuán yu gamitán yu dád para katô ákniyu sarili dayó.

⁴Na, igtayyugan yud tô Manama iring katô bayi na iglibug katô duma din! Ilingawan yu basì na tô manubù na ágginaawa katô kadigárran kani banuwa, sikandin tô gusig katô Manama. Purisu agad sadan tô ágginaawa katô kadigárran kani banuwa, inému sikandin na usig katô Manama. ⁵Yakó yu ágpanámdámmi na ándà ágpulusán katô kagi ka Manama na igsulat,

“Tuu dakál tô kakalyag katô espiritu na igpóddô katô Manama dini áknita na ágkasarigan ki tun ta saruwan ka Manama.”

^h 3:12 Purisu kailangan madigár tô ágkagin ta na di kabaláttan ka madat.

⁶Asal tuu pa dakál tó kedu ka Manama áknita. Purisu mà katô kagi ka Manama na igsulat,

“Sapadan katô Manama tó ágpdadurung,
asal ágkêduwan din tó ágpabbabà.”ⁱ

⁷Purisu bággé yu tó sarili yu tun ta Manama. Atuwi yu si Maibuyan, asta malaguy sikandin tikud tun ákniyu. ⁸Padani kó tun ta Manama, asta padani sikandin tun ákniyu. Sikiyu na mga masalà-salà, sódói yu tó madat mga áglumun yu. Sikiyu na mga ágduwa-duwa, bannal kó sarig tun ta Manama. ⁹Rákkád kó, asta ranu kó, asta sággó kó tingód katô salà na iglumu yu. Yakó ánggisi asta ágkadayawan katô salà yu, asal sággó kó asta ranu kó kani. ¹⁰Pabbabà kó tun ta saruwan katô Áglangngagán, asta sikandin tó pallayat ákniyu.

Karuud ka unawa ta

¹¹Na, mga kataladi, yakó ágkagi ka madat, su tó ágkagi ka madat ó ágruud katô kataladi din, ágkagi sikandin ka madat asta ágruud katô sugù ka Manama. Atin ka ágruud kó katô sugù ka Manama, ò kó ágbánnal katô sugù, asal inému kó baling tararuud. ¹²Asal sábbad dád tó igbággé katô mga sugù, asta sikandin dád tó ágruud katô áglumun katô mga manubù. Manama dád tó makému tumábbus asta sumupak katô mga manubù. Purisu ò mému ka rumuud kó katô unawa yu.

Yakó ágpdadurung tingód katô mga plano yu

¹³Sikiyu na ágplano, paminág kó. Atin ka duwán plano yu, ágkagi kó na, “Kani pa ó simag madun ké tun ta sábbad lunsud, asta móddô ké dutun ka sábbad ámmé, asta numegosyo ké ébô makasalapí ké.” ¹⁴Asal ándà yu kasóddóri ka ándin tó makadunggù ákniyu simag, su tó kantayan ta iring katô áddup na sékót dád ágkandà. ¹⁵Madigár pa baling ka kumagi kó, “Atin ka duwán kakalyag katô Áglangngagán, manté ké pô asta duwán lumun dé.” ¹⁶Asal ágpdadurung kó gó ukit katô mga plano yu. Na, madat ni kapadadurung yu tun ta saruwan ka Manama.

¹⁷Atin ka isóddóran ka manubù ka ándin tó nángngà áglumun, asal ò din áglumun, pakalumu sikandin ka salà.

Kasapad katô mga ágkaduwánnan

5 ¹Paminág kó na mga ágkaduwánnan. Sággó kó asta ullaó kó tingód katô kadattan na dumunggù ákniyu. ²Tô kaduwánnan yu maróddóg, asta tó mga umpak yu kátkáttán. ³Agad igtagù yu tó salapí yu, asal igkararing asta ándà dán ágpulusán. Tó kararing iring katô apuy na makadadat ákniyu, su tó gó tó pasóddór na kailangan supakan

ⁱ 4:6 Mga Panultihon 3:34.

kó. Inugunan dád gó tō kalimud yu su masig dán gó dumunggù tō mga tapuri álló na supakan kó. ⁴Paminág yu tō mga taralumu tun ta kinamát yu na ándà yu tandani. Igullaó tō mga tarakáttu tun ta Áglangngagán na Manama na matulus katō langun, asta igdinág din sikandan. ⁵Tuu kó ágkadayawan nit banuwa, asta iring kó na mannap na iyón su igpalambù yu tō ákniyu sarili na igtaganà para katō álló na matayan asta supakan kó. ⁶Igruudan asta igmatayan yu tō mga manubù na ándà salà, agad ándà dan atu ákniyu.

Pallayat yu é ginawa yu

⁷Purisu mga kataladi, pallayat yu tō ginawa yu sippang ka lumónód tō Áglangngagán. Panámdám yu tō taralumu ka tanà na mallayat é ginawa din rōggun gangatan din tō tagnà asta tō katapuriyan udan ébò duwán madigár mga buuy katō igpamula din. ⁸Sikiyu pagsik, pallayat yu tō ginawa yu. Pasarig yu tō pusung yu su masig dán lumónód tō Áglangngagán.

⁹Na, mga kataladi, yakó ágburáng-buráng agó supakan kó katō Áglangngagán, su masig dán lumónód tō rumuud katō áglumun ta.

¹⁰Na, mga kataladi, sampát yu tō mga propeta sayyan na igulit-ulit katō kagi ka Áglangngagán, su sikandan tō inému iringanan ta ukit katō kallayatan ka ginawa dan katō karasayan na inókitan dan. ¹¹Isóddóran tad na ágkadayawan tō mga ikatiis katō karasayan. Igulitan kó tingód katō katiis i Job.^j Isóddóran yu na agad irasayan sikandin, madigár tō igsuli katō Áglangngagán kandin tun ta katapuriyan, su tuu madigár tō Áglangngagán, asta médu-édu sikandin.

¹²Na, mga kataladi ku, tō tuu ágkailanganán ka langun, atin ka tumandò kó, dì mému ka pókitán tō tandò tun ta langit, ó tanà, ó agad ándin tō ágkagin. Kagi yu dád tō bánnal, su nángngà ka kumagi kó dád na “Óó” ó “Dì,” ébò dì kó supakan katō Manama.

Bánnal kadasal

¹³Atin ka duwán manubù tun ákniyu na ágkahirapan, kailangan dumasal sikandin tun ta Manama. Atin ka duwán ágkadayawan, kailangan kumanta sikandin ka kadurung tun ta Manama. ¹⁴Atin ka duwán manubù tun ákniyu na ágkabógókan, kailangan pakangén din tō mga tarapid ka simbaan ébò dumasal dan para kandin asta patalluan ka langis^k na ágtákkássan katō katawar ka ngadan katō Áglangngagán. ¹⁵Na, ukit katō kadasal na ágtákkássan katō kapamaké, tō ágkabógókan kólian katō Áglangngagán. Atin ka duwán salà na ilmu din, pasinsiyaan sikandin.

^j 5:11 Ahaán tō Job 1:21-22; 2:10; Salmo 103:8 ^k 5:14 Tō mga Judio ággamit katō langis ka olibo.

¹⁶Purisu pólité kó katô mga salà yu asta padasalé kó ébô kólian kó. Ukit ka kadasal katô manubù na nángngà tun ta saruwan ka Manama, duwán dakál ágkalumuwan din. ¹⁷Sampát yu si Elias tô propeta ka Manama sayyan. Agad manubù sikandin na magunawa áknita, asal maggát sikandin igdasal ébô di mudan. Purisu dalám ka tállu ámmé ágtángngà, ándà gó udan.¹ ¹⁸Tô igdasal puman sikandin ébô mudan, igudan puman asta igbuuy tô mga igpamula.

¹⁹Na, mga kataladi ku, atin ka duwán manubù diyán ákniyu na igsuwé tikud tun ta kabánnalan, madigár ka duwán tun ákniyu na kumagi ébô palónód kandin, ²⁰su kasóddóran yu na tô makapalónód katô sábbad masalà-salà tikud tun ta madat linumuwan din, tô gó tô makapaluwà katô iglumu ka salà tikud tun ta supak na ándà ágtamanán, asta pasinsiyaan ka Manama tô marapung mga salà din.

¹ 5:17 Ahaán tô 1 Mga Harì 17:1; 18:1